

砂留街

李得福

內埔鄉內田村對圓環西片啄尾屋小巷仔入去，到媽祖廟前老市場邊，這條路今嘅路名係西安路，庄項个老人家大部分講“砂留街”，有兜人又講係“蛇溜街”，對外庄人來講，一個賊牯三個名，感覺蓋奇怪。這條路仰哋會安到“砂留街”呢？

清朝康熙年間，有蓋多廣東省个客家人，坐船仔來到台灣，有兜人對東港換坐細竹排仔來到糶糶庄，有兜坐到下樹山，大家拖扛打陣來開墾「內陸个埔仔」。漸漸哋人多咧，變成內埔庄，人口過集中變成做生理个老街，東片析係東成巷、西片析係西安巷，後來南北向个省公路對內埔庄經過，路較大條又筆直係廣濟路。

龍頸溪个源頭係隘寮溪个伏流水，對水門庄、隘寮庄流向浮圳庄，在東片新庄浮出地面變成龍頸溪。流經新東勢庄，經過早仔角南片護龍伯公壇前同大段埤溪雙合水，合流後水量變大流向內埔庄，在媽祖宮後背轉兩個彎，跨等內埔庄个西析，流向西南片个竹田庄，在糶糶庄形成達達港，再向南片流入東港溪。

頭擺內埔庄脣个龍頸溪無做礮坎，圳溝兩片生滿蓋多笏竹墩同雜樹墩，河面正伸丈零闊，斷竹燥木不時塞斷水流，發大水時又過嚴重，兩片田坵个泥油都分大水打淨淨，故所內埔庄个西片析，今嘅个西安路同李屋祠堂附近係較低窪个地形，係一塊長形个壩溝。年視年人口漸漸多咧，村民在這起屋仔歇，變成西安巷這條路。

每年夏秋个時節，風搓警報跨著就會落大雨發大水，龍頸溪涸汶个河壩水帶來大量个泥沙，對七份子開始經過龍頸仔，大水浮過圳溝，洶激湧向內埔庄流去。東成巷因為地勢較高，較毋會積水，廣濟路係新做个省道公路，也係南北交通要道，排水系統設計好毋會淹水。每擺發大水過後，水退咧，大量个爛泥砂就會留在西安巷這條路上，必須用人力剷除，就因為恁呢村民將這條路安作「砂留街」。龍頸溪作礮後，內埔街毋會再發大水哋，砂留街也無留砂好欣賞咧！